

ՀՀ ԿԱ պետական եկամուտների կոմիտե

Հարկային և մաքսային մարմինների գանգատարկման հանձնաժողով

Ո Ր Ո Շ ՈՒ Մ 22/7

14 ապրիլի 2017թ.

Քննարկվեց «ԹՐԱՔ ՍԵՐՎԻՍ» ՍՊԸ գանգատը՝ ՀՀ ԿԱ ՊԵԿ Մաշտոցի ՀՏ պետի 10.02.2017թ. թիվ 575 գրությամբ ներմուծման հարկային հայտարարագիր ներկայացնելու առաջարկությունն ոչ իրավաչափ ճանաչելու վերաբերյալ:

«ԹՐԱՔ ՍԵՐՎԻՍ» ՍՊԸ գանգատում բերված փաստարկները.

10.06.2016թ. ՀՀ ՊՆ-ի որպես գնորդի և «ԹՐԱՔ ՍԵՐՎԻՍ» ՍՊԸ-ի որպես վաճառողի միջև կնքվել է հ. ՇՀԱՊՁԲ-4/7-2 պամանագիրը՝ համաձայն որի ի թիվս այլ ապրանքների վաճառողը պարտավորվել է գնորդին մատակարարել պայմանագրի հավելվածներում նշված տեխնիկական տվյալներով 40 հատ կոմպրեսորներ:

Վերոգրյալ կոմպրեսորները ձեռք բերելու համար 2016թ. օգոստոսի 8-ին «ԹՐԱՔ ՍԵՐՎԻՍ» ՍՊԸ-ի և Ռուսաստանի Դաշնության անհատ ձեռնարկատեր «Նաբիեվա Նատալյա Վլադիմիրովնա»-ի (այսուհետ նաև՝ Ա/Ձ) միջև (իրավաբանական հասցեն՝ ՌԴ Թաթարստանի Հանրապետություն, Նաբերեժնիյե Չելնի) կնքվել է առուծախի թիվ 0001771 պայմանագիր, որի հիման վրա 2016թ. օգոստոսի 9-ին 40 հատ մեքենայի կոմպրեսորներ մատակարարելու համար Ա/Ձ-ի հաշվեհամարին է փոխանցվել 335320 ռուսական ռուբլի:

2016թ. օգոստոսի 10-ին Ա/Ձ-ի իրավաբանական հասցեում կազմվել է թիվ 004204 բեռնագրը և դրա լուսապատճենն էլեկտրոնային եղանակով ուղարկվել է Մոսկվա քաղաք, որտեղ գտնվել է մատակարարվող ապրանքը և այն գնորդի՝ «ԹՐԱՔ ՍԵՐՎԻՍ» ՍՊԸ-ի (այսուհետ նաև՝ ընկերություն) խնդրանքով հանձնվել է «Արարատ տրանս» ՍՊԸ բեռնափոխադրող կազմակերպությանը, իսկ վերոգրյալ փաստաթղթերի բնօրինակներն իր հերթին ուղարկվել է Մոսկվա քաղաքում «Արարատ տրանս» ՍՊԸ-ի կայանատեղի հասցեով: Ի դեպ, ՌԴ Մոսկվա և Նաբերեժնիյե Չելնի քաղաքների միջև հեռավորությունը շուրջ 1000 կիլոմետր է:

«ԹՐԱՔ ՍԵՐՎԻՍ» ՍՊԸ-ն 10.08.2016թ. հ. 1008 լիազորագրով լիազորել է «Արարատ տրանս» ՍՊԸ-ին ստանալու և նշանակման կետ հասցնելու նշված 40 հատ կոմպրեսորները: Նույն լիազորագրով լիազորել է վարորդ ապրանքը տեղափոխող վարորդ Մեդետբեկ Բագիշի Բուտոյարովին:

2016թ. օգոստոսի 14-ին «Արարատ տրանս» ՍՊԸ բեռնափոխադրող կազմակերպության բեռնատարը պետք է շարժվեր Մոսկվա քաղաքից դեպի Երևան, սակայն դեռևս փաստաթղթերի բնօրինակները տեղ չէին հասել, ուստի որոշվեց չսպասել բնօրինակներին և ապրանքը տեղափոխվի փաստաթղթերի լուսապատճեններով, այնուհետև բնօրինակները տեղ հասնելուն պես նույն բեռնափոխադրող կազմակերպության այլ բեռնատարով կհասցվի «ԹՐԱՔ ՍԵՐՎԻՍ» ՍՊԸ-ին: Բանն այն է, որ ուշացումը կհանգեցներ ընկերության և ՀՀ ՊՆ-ի միջև նշված ապրանքների վերաբերյալ կնքված մատակարարման պայմանագրի ժամկետների խախտման և ընկերությունը ստիպված կլիներ վճարելու պայմանագրով նախատեսված տուգանքներ:

2016թ. օգոստոսի 17-ին նշված 40 հատ մեքենայի կոմպրեսորները հասցվել է ՌԴ Հյուսիս-Օսեթական մաքսակետ, որտեղ կատարվել են համապատասխան

ձևակերպումները՝ լրացվել և կնիքվել է թիվ 10803040/170816/0031605 տարանցման հայտարարագիրը, որում նշված է մատակարարի և ստացողի տվյալները, բեռի քաշը՝ 535,360 կգ, արժեքը՝ 335320 ռուբլի, հիմքը՝ 10.08.2016թ. թիվ 0004204 հաշիվ ապրանքագիրը: Կնիքներ են դրվել նաև համապատասխան միջազգային ապրանքատրանսպորտային ներդիրի վրա:

2016թ. օգոստոսի 18-ին նշված բեռը հասել է ՀՀ Բագրատաշենի մաքսակետ, որտեղ թիվ 10803040/170816/0031605 տարանցման հայտարարագրի և միջազգային ապրանքատրանսպորտային ներդիրի, որում գրանցված են անհրաժեշտ բոլոր տվյալները՝ առաքող, ստացող, հաշիվ ապրանքագրի ամսաթիվ և համար (10.08.2016թ., թիվ 004204) ապրանքի քաշը՝ 535,360 կգ, արժեքը՝ 335320 ռուբլի, վրա դրվել են մաքսակետի համապատասխան կնիքներ:

Դրանից հետո վերը նշված փաստաթղթերի բնօրինակները՝ միջազգային ապրանքատրանսպորտային ներդիրը, 10.08.2016թ. թիվ 0004204 հաշիվ ապրանքագիրը, ապրանքային ներդիրը հանձնվել է նույն բեռնափոխադրող կազմակերպության՝ «Արարատ Տրանս» ՍՊԸ-ի Մոսկվայում գնտնվող ներկայացուցչին, ով իր հերթին դրանք փոխանցել է իրենց ընկերության Երևան ուղևորվող հերթական 817 OF 61 համարանիշի բեռնատար մեքենայի վարորդին, խնդրելով դրանք Երևանում փոխանցել ընկերությանը: Վարորդը սխալմամբ բնօրինակ փաստաթղթերը մեքենայով առաքվող բեռների փաստաթղթերի հետ միասին 2016թ. օգոստոսի 22-ին ներկայացրել է ՌԴ Հյուսիս-Օսեթական մաքսակետ, որտեղ կրկին կատարվել են համապատասխան ձևակերպումները՝ լրացվել է թիվ 10803040/220816/0032488 տարանցման հայտարարագիրը և դրան կից վերը նշված բոլոր փաստաթղթերը կնիքվել են ինչպես վերը նշված, այնպես էլ Բագրատաշենի մաքսակետում:

Բեռնափոխադրող կազմակերպության վարորդը 2016թ. օգոստոսի 22-ին ՀՀ ներկրած ապրանքները հասցեատերերին (շուրջ 17 հասցեատեր) հանձնելուց հետո, նկատելով առանց ուղեբեռի մնացած ընկերության փաստաթղթերը, հասկացել է, որ սխալ է թույլ տվել, դրանք չպետք է ներկայացնեք մաքսային ձևակերպումների և այդ մասին տեղեկացրել է իրենց ընկերության ղեկավարությանը:

«Արարատ Տրանս» ՍՊԸ-ն գրավոր հայտնել է ընկերությանն այն մասին, որ Մոսկվայի իրենց ներկայացուցիչը նախկինում փոխադրված բեռի բնօրինակ փաստաթղթերը փոխանցել է Երևան ուղևորվող հերթական բեռնատարի վարորդին, որպեսզի վերջինս դրանք հանձնի ընկերությանը, սակայն վարորդը, անուշադրության պատճառով այդ փաստաթղթերն ավտոմեքենայում գտվող մյուս բեռների փաստաթղթերի հետ մաքսակետում ներկայացրել է գրանցման: Միաժամանակ, 2016թ. սեպտեմբերի 2-ին բեռնափոխադրող կազմակերպությունը՝ «Արարատ Տրանս» ՍՊԸ-ն դիմել է ՌԴ-ի Հյուսիս-Օսեթական մաքսակետի պետին, հայտնել կատարվածի մասին և խնդրել է օգնել առաջացած խնդրի կարգավորման հարցում:

2016թ. հոկտեմբերի 13-ին «Արարատ Տրանս» ՍՊԸ-ն ՌԴ-ի Հյուսիսային Օսեթիայի մաքսակետից ստացել է թիվ 12-24/11490 պատասխան գրությունն այն մասին, որ ներկա պահին մաքսային ձևակերպումներն անվավեր ճանաչելու հնարավորություն չկա՝ մաքսային տարանցման մաքսային գործընթացներն ավարտված լինելու պատճառով:

2016թ. նոյեմբերի 13-ին ընկերությունը գրավոր դիմել է ՊԵԿ նախագահին, ներկայացրել իրավիճակը և խնդրել անվավեր համարել 22.08.2016թ. ընկերության վերաբերյալ ձևակերպված մաքսային փաստաթղթերը:

2016թ. նոյեմբերի 24-ի ՀՀ ԿԱ ՊԵԿ նախագահի առաջին տեղակալի թիվ 02/8-3/36253-16 պատասխան գրությամբ հայտնվել է, որ «Մաքսային միության մաքսային օրենսգրքի մասին» Պայմանագրի 192-րդ հոդվածի 2-րդ մասի համաձայն՝ հայտարարատուի գրավոր դիմումով, Մաքսային միության ապրանքների մասին մաքսային հայտարարագիրը կարող է չեղարկվել նախքան ապրանքների փաստացի մեկնումը Մաքսային միության մաքսային տարածքից, այդ թվում՝ ապրանքների բացթողման մասին որոշում ընդունելուց հետո: Միաժամանակ հայտնվել է, որ Մաքսային հայտարարագիրը կարող է չեղարկվել այն մաքսային մարմինը, որը Մաքսային միության անդամ պետությունների օրենսդրությանը համապատասխան իրավասու է կատարել մաքսային հայտարարագրերի գրանցում, ուստի ՀՀ մաքսային մարմիններն իրավասու չեն չեղարկել թիվ 10803040/220816/0032488 տարանցման հայտարարագիրը:

Ընկերության խնդրանքով Ա/Ձ-ն գրավոր ներկայացրել է 01.01.2016թ. մինչև 13.12.2016թ. իր և ընկերության միջև փոխադարձ հաշվարկի ճշտման ակտը, որով հավաստել է, որ 09.08.2016թ. մատակարարվելիք ապրանքի դիմաց ընկերության կողմից իր հաշվեհամարին է փոխանցվել 335320 ռուբլի, ապրանքը՝ 10.08.2016թ. թիվ 004204 հաշվիվ ապրանքագրով հանձնվել է ընկերությանը, 26.08.2016թ. մատակարարվելիք ապրանքի դիմաց իր հաշվեհամարին է փոխանցվել 154418,4 ռուբլի, ապրանքը՝ 29.08.2016թ. թիվ 004546 հաշվիվ ապրանքագրով հանձնվել է ընկերությանը և 13.12.2016թ. դրությամբ փոխադարձ պարտքեր չկան:

2016թ. դեկտեմբերի 16-ին դիմում է ներկայացվել ՀՀ ԿԱ ՊԵԿ Մաշտոցի հարկային տեսչության պետին, հայտնելով կատարվածի մասին և ներկայացվել են համապատասխան փաստաթղթերի պատճենները:

2017թ. փետրվարի 10-ին ՀՀ ԿԱ ՊԵԿ Մաշտոցի հարկային տեսչության պետի թիվ 575 գրությամբ տեղեկացվել է, որ ընկերության կողմից 2016թ. օգոստոս ամսին կատարված ներմուծումների հետ կապված հարցում է կատարվել մաքսային մարմնին և ստացվել է պատասխան այն մասին, որ ընկերության կողմից 22.08.2016թ. ներմուծված 10803040/220816/0032488 և 10803040/220816/0032489 տարանցման հայտարարագրերով հայտարարագրված բեռները փաստացի ՀՀ չներմուծման փաստը մաքսային մարմնի տրամադրության տակ գտնվող տեղեկություններով չի հիմնավորվում: Նույն գրությամբ առաջարկվել է ընկերությանը սեղմ ժամկետում ներկայացնել ներմուծման հարկային հայտարարագրերը: Ի դեպ, վերոգրյալ գրության մեջ նշված 22.08.2016թ. թիվ 10803040/220816/0032489 տարանցման հայտարարագիրը չի առնչվում ընկերությանը:

Ընկերությունը խնդրում է ոչ իրավաչափ ճանաչել Մաշտոցի հարկային տեսչության պետի առաջարկությանը՝ 22.08.2016թ. չներմուծված բեռների վերաբերյալ ներմուծման հարկային հայտարարագիր ներկայացնելու վերաբերյալ, հետևյալ հիմնավորումներով և պատճառաբանությամբ:

1. «ԹՐԱՔ ՍԵՐՎԻՍ» ՍՊԸ-ն 22.08.2016թ. ապրանք չի ներկրել Հայաստանի Հանրապետություն, իսկ 22.08.2016թ. թիվ 10803040/220816/0032488 տարանցման հայտարարագիրը զուտ թյուրիմացության արդյունք է, որպիսի փաստը հաստատվում է «Արարատ Տրանս» ՍՊԸ-ի համապատասխան գրություններով, Ա/Ձ-ի ներկայացված փոխադարձ հաշվարկի ակտով, թիվ 10803040/170816/0031605 և 10803040/220816/0032488 տարանցման հայտարարագրերին կից հաշիվ-ապրանքագրերի նույնականությամբ, առաջին դեպքում՝ լուսապատճենը, երկրորդ դեպքում՝ բնօրինակը:

2. ՀՀ ԿԱ ՊԵԿ Մաշտոցի հարկային տեսչության պետի առաջարկությունը կատարելու դեպքում, ընկերությունը պարտադրված է լինելու ներկայացնել իրականության մեջ գոյություն չունեցածի վերաբերյալ հարկային հայտարարագիր՝ դրանից բխող ընկերության համար բացասական հետևանքներով: Առաջարկությունն ընդունելու դեպքում վերոգրյալ խնդիրներն առաջանում են ոչ միայն ընկերության, այլ դրանով կստացվի, որ ընկերությունը ոչ իրավաչափ կերպով խնդիրներ է առաջացնում նաև Ա/Ձ-ի համար:

3. Ինչ վերաբերում է ՀՀ ԿԱ ՊԵԿ նախագահի առաջին տեղակալի պատասխան գրությանը, թե «Մաքսային միության մաքսային օրենսգրքի մասին» Պայմանագրի 192-րդ հոդվածի 2-րդ մասի համաձայն՝ հայտարարատուի գրավոր դիմումով, Մաքսային միության ապրանքների մասին մաքսային հայտարարագիրը կարող է չեղարկվել նախքան ապրանքների փաստացի մեկնումը Մաքսային միության մաքսային տարածքից», ապա դա ընդամենն օգնում է գործին և ոչ թե խանգարում, քանի որ 22.08.2016թ. հայտարարագրով նրանում նշված ապրանքը չի եղել և բնականաբար փաստացի որևէ տեղ չի մեկնել, այն մաքսային միության մաքսային տարածքից դուրս չի եկել: Բացի այդ, եթե ՀՀ պետական եկամուտների կոմիտեն չի ընդունում հարկատուի փաստարկները, իրավագոր է կատարելու համապատասխան հետաքննություն և արդյունքների մասին հայտնելու ՌԴ համապատասխան մարմնին՝ հիշյալ տարանցման հայտարարագիրն անվավեր ճանաչելու համար:

ՀՀ ԿԱ ՊԵԿ հարկային և մաքսային մարմինների գանգատարկման հանձնաժողովի եզրակացությունը.

ՀՀ ԿԱ ՊԵԿ հարկային և մաքսային մարմինների գանգատարկման հանձնաժողովը (այսուհետ նաև՝ Հանձնաժողով), ուսումնասիրելով սույն գործին առնչվող նյութերն ու ապացույցները եկավ հետևյալ եզրակացության.

Քննարկման ընթացքում նշվեց, որ ՀՀ Պաշտպանության նախարարության և «ԹՐԱՔ ՍԵՐՎԻՍ» ՍՊԸ-ի միջև 10.06.2016թ. կնքվել է թիվ ՇՀԱՊՁԲ-4/7-2 պայմանագիրը, որի համաձայն «ԹՐԱՔ ՍԵՐՎԻՍ» ՍՊԸ-ն պարտավորվել է մատակարարել 40 հատ կոմպրեսորներ:

Վերոգրյալ կոմպրեսորները ձեռք բերելու համար 2016թ. օգոստոսի 8-ին «ԹՐԱՔ ՍԵՐՎԻՍ» ՍՊԸ-ի և Ռուսաստանի Դաշնությունում հաշվառված անհատ ձեռնարկատեր Նաբիեվա Նատալյա Վլադիմիրովնայի միջև կնքվել է առուծախի թիվ 0001771 պայմանագիրը, որի հիման վրա 2016թ. օգոստոսի 9-ին 40 հատ մեքենայի կոմպրեսորներ մատակարարելու համար Ա/Ձ-ի հաշվեհամարին է փոխանցվել 335320 ռուսական ռուբլի:

2016թ. օգոստոսի 10-ին կազմվել է թիվ 004204 բեռնագրը և դրա լուսապատճենն էլեկտրոնային եղանակով ուղարկվել է ք.Մոսկվա, որտեղ գտնվել է մատակարարվող ապրանքը, և այն գնորդի՝ «ԹՐԱՔ ՍԵՐՎԻՍ» ՍՊԸ-ի խնդրանքով հանձնվել է «Արարատ տրանս» ՍՊԸ բեռնափոխադրող կազմակերպությանը:

«ԹՐԱՔ ՍԵՐՎԻՍ» ՍՊԸ-ն 10.08.2016թ. թիվ 1008 լիազորագրով լիազորել է «Արարատ տրանս» ՍՊԸ-ին ստանալու և նշանակման կետ հասցնելու նշված 40 հատ կոմպրեսորները:

2016թ. օգոստոսի 14-ին «Արարատ տրանս» ՍՊԸ բեռնափոխադրող կազմակերպության բեռնատարը Մոսկվա քաղաքից ուղևորվել է դեպի Երևան և չսպասելով փաստաթղթերի բնօրինակների տեղ հասնելուն, նշված 40 հատ կոմպրեսորները տեղափոխվել են փաստաթղթերի լուսապատճեններով:

2016թ. օգոստոսի 17-ին 40 հատ մեքենայի կոմպրեսորները հասցվել է ՌԴ Հյուսիս-Օսեթական մաքսակետ, որտեղ կատարվել են համապատասխան ձևակերպումները՝ լրացվել և կնքվել է թիվ 10803040/170816/0031605 տարանցման հայտարարագիրը, որում նշված է մատակարարի և ստացողի տվյալները, բեռի քաշը՝ 535,360 կգ, արժեքը՝ 335320 ռուբլի, հիմքը՝ 10.08.2016թ. թիվ 0004204 հաշիվ ապրանքագիրը:

2016թ. օգոստոսի 18-ին նշված բեռը հասել է ՀՀ Բագրատաշենի մաքսակետ, որտեղ թիվ 10803040/170816/0031605 տարանցման հայտարարագրի և միջազգային ապրանքատրանսպորտային ներդիրի վրա դրվել են մաքսակետի համապատասխան կնիքները:

Այնուհետև, վերը նշված փաստաթղթերի բնօրինակները՝ միջազգային ապրանքատրանսպորտային ներդիրը, 10.08.2016թ. թիվ 0004204 հաշիվ ապրանքագիրը, ապրանքային ներդիրը հանձնվել է նույն բեռնափոխադրող՝ «Արարատ Տրանս» ՍՊԸ-ի Մոսկվայում գնտնվող ներկայացուցչին: Նշված փաստաթղթերի բնօրինակները փոխանցվել են «Արարատ Տրանս» ՍՊԸ-ի Երևան ուղևորվող 817 ՕԲ 61 համարանիշի բեռնատար մեքենայի վարորդին՝ դրանք Երևան տեղափոխելու և «ԹՐԱՔ ՍԵՐՎԻՍ» ՍՊԸ-ին փոխանցելու համար: Սակայն վարորդը սխալմամբ բնօրինակ փաստաթղթերը մեքենայով առաքվող բեռների փաստաթղթերի հետ միասին 2016թ. օգոստոսի 22-ին ներկայացրել է ՌԴ Հյուսիս-Օսեթական մաքսակետ, որտեղ կրկին անգամ կատարվել են համապատասխան ձևակերպումները՝ լրացվել է թիվ 10803040/220816/0032488 տարանցման հայտարարագիրը և դրան կից վերը նշված բոլոր փաստաթղթերը կնիքվել են ինչպես վերը նշված, այնպես էլ Բագրատաշենի մաքսակետերում:

Տեղի ունեցածի մասին «Արարատ Տրանս» ՍՊԸ-ն գրավոր հայտնել է «ԹՐԱՔ ՍԵՐՎԻՍ» ՍՊԸ-ին: Միաժամանակ, 2016թ. սեպտեմբերի 2-ին «Արարատ Տրանս» ՍՊԸ-ն դիմել է ՌԴ-ի Հյուսիս-Օսեթական մաքսակետի պետին, հայտնել կատարվածի մասին և խնդրել է օգնել առաջացած խնդրի կարգավորման հարցում:

2016թ. հոկտեմբերի 13-ին «Արարատ Տրանս» ՍՊԸ-ն ՌԴ-ի Հյուսիսային Օսեթիայի մաքսակետից ստացել է թիվ 12-24/11490 պատասխան գրությունն այն մասին, որ ներկա պահին մաքսային ձևակերպումներն անվավեր ճանաչելը հնարավոր չէ՝ մաքսային տարանցման մաքսային գործընթացներն ավարտված լինելու պատճառով:

«ԹՐԱՔ ՍԵՐՎԻՍ» ՍՊԸ-ն 2016թ. նոյեմբերի 13-ին գրավոր դիմել է ՊԵԿ նախագահին և խնդրել անվավեր ճանաչել 22.08.2016թ. կրկին անգամ ընկերության վերաբեյալ ձևակերպված մաքսային փաստաթղթերը: ՀՀ ԿԱ ՊԵԿ նախագահի առաջին տեղակալի 2016թ. նոյեմբերի 24-ի թիվ 02/8-3/36253-16 պատասխան գրությամբ մասնավորապես հայտնվել է, որ ՀՀ մաքսային մարմիններն իրավասու չեն չեղարկել թիվ 10803040/220816/0032488 տարանցման հայտարարագիրը:

«ԹՐԱՔ ՍԵՐՎԻՍ» ՍՊԸ կողմից 2016թ. դեկտեմբերի 16-ին դիմում է ներկայացվել ՀՀ ԿԱ ՊԵԿ Մաշտոցի հարկային տեսչության պետին, հայտնելով կատարվածի մասին և ներկայացվել են համապատասխան փաստաթղթերի պատճենները, սակայն ՀՀ ԿԱ ՊԵԿ Մաշտոցի հարկային տեսչության պետի 2017թ. փետրվարի 10-ին թիվ 575 պատասխան գրությամբ տեղեկացվել է, որ հաշվի առնելով ընկերության կողմից 22.08.2016թ. ներմուծված 10803040/220816/0032488 տարանցման հայտարարագրով հայտարարագրված բեռների ՀՀ տարածք չներմուծվելու փաստը մաքսային մարմնի տրամադրության տակ գտնվող

տեղեկություններով չի հիմնավորվել, ուստի առաջարկվել է ընկերությանը սեղմ ժամկետում ներկայացնել ներմուծման հարկային հայտարարագրերը:

Հանձնաժողովը, ուսումնասիրելով սույն գործում առկա համապատասխան ապացույցները եկավ եզրակացության, որ 22.08.2016թ. 10803040/220816/0032488 տարանցման հայտարարագրով հայտարարագրված բեռների փաստացի ներմուծում ՀՀ տարածք տեղի չի ունեցել, հետևապես այդ հայտարարագրում նշված ապրանքների մասով ներմուծման հարկային հայտարարագիր ներկայացնելու պարտականություն ընկերությունը չի կրում, հետևյալ հիմնավորմամբ.

Նախ հարկ է նշել, որ ՀՀ պաշտպանության նախարարության և «ԹՐԱՔ ՍԵՐՎԻՍ» ՍՊԸ-ի միջև 10.06.2016թ. կնքվել է թիվ ՇՀԱՊՁԲ-4/7-2 պայմանագիրը (այսուհետ նաև՝ Պայմանագիր), որի 1.1 կետի համաձայն «ԹՐԱՔ ՍԵՐՎԻՍ» ՍՊԸ-ն պարտավորվել է Պայմանագրով սահմանված կարգով, ծավալներով և նախատեսված ժամկետներում (Հավելված թիվ 2) ՀՀ պաշտպանության նախարարությանը մատակարարել Պայմանագրի Հավելված թիվ 1-ով նախատեսված ապրանքը:

Տվյալ դեպքում Պայմանագրի Հավելված թիվ 2 համաձայն «ԹՐԱՔ ՍԵՐՎԻՍ» ՍՊԸ-ն պարտավորվել է մատակարարել «Կոմպրետոր հավաքական» ընդամենը 40 հատ:

Այլ ապացույցներ Պայմանագրով նախատեսված քանակից բացի այլ քանակության «Կոմպրետոր հավաքական» մատակարարելու պարտավորություն «ԹՐԱՔ ՍԵՐՎԻՍ» ՍՊԸ-ն ստանձնած լինելու վերաբերյալ սույն գործում առկա չէ:

Բացի այդ, «ԹՐԱՔ ՍԵՐՎԻՍ» ՍՊԸ-ի կողմից 22.08.2016թ. Հայաստանի Հանրապետության տարածք փաստացի ապրանք ներկրված չլինելու հանգամանքը հիմնավորվում է նաև «Արարատ Տրանս» ՍՊԸ-ի համապատասխան գրություններով, Ա/Ձ Նաբիեվա Նատալյա Վլադիմիրովնայի ներկայացված փոխադարձ հաշվարկի վերաբերյալ ակտով, ինչպես նաև 10.08.2016թ. թիվ 10803040/170816/0031605 և 22.08.2016թ. թիվ 10803040/220816/0032488 տարանցման հայտարարագրերին կից հաշիվ-ապրանքագրերի նույնականությամբ:

Ելնելով քննարկման արդյունքներից և ղեկավարվելով «Հարկային ծառայության մասին» ՀՀ օրենքի 43.1-րդ հոդվածի, «Մաքսային ծառայության մասին» ՀՀ օրենքի 37-րդ հոդվածի պահանջներով Հանձնաժողովը

ո ր ո շ ու մ է՝

«ԹՐԱՔ ՍԵՐՎԻՍ» ՍՊԸ գանգատը՝ ՀՀ ԿԱ ՊԵԿ Մաշտոցի ՀՏ պետի 10.02.2017թ. թիվ 575 գրությամբ ներմուծման հարկային հայտարարագիր ներկայացնելու առաջարկությունն ոչ իրավաչափ ճանաչելու վերաբերյալ, բավարարել:

Հանձնաժողովի նախագահ՝



Վ.ՄԻՐՈՒՄՅԱՆ